



## EQIKKAANEQ

Ulloq siulleq 23. maj 2014

"Inuunerinneq" qulequtaralugu inoqarfiit minnerit ataatsimeersuarnerat aallannerlugu KANUNUPE'p siulittaasua Jens Kristian Therkelsen aamma Naalakkersuisunut ilaasortaq Jens-Erik Kirkegaard oqaaseqarnerminni pingaartillugu oqaatigaat suliffissaaleqinerup ilaatigut aamma nunaqarfinni atuuttup pimoorullugu suliniuteqarfigineqarnissaa. Aammattaaq eqqaavaat nunaqarfiit ilaasa inuerukkiartuinnarnerat assut ernumanartoq, taamaattoqarneratalu ilaginnaannarnagu ilorraap tungaanut saatinniarlugu aaqqissuussamik iliuuseqarnissaq pisariaqalersoq.

Ullaap tungaani saqqummiussisut Naalakkersuisup Vittus Qujaukitsup, Kåre Henriksenip ARTEK-imeersup aamma Ulla Lyngep Aningaasaqarnermut Siunnersuisooqatigiinneersup nunatsinni nunaqarfiit aningaasarsiornikkut inuussutissarsiornikkullu inissisimanerat sammivaat.

Kingusinnerusukkut nunatsinni borgmesterit saqqummiipput inoqarfiit minnerit inissisimanerat anguniagaallu pillugit. Aammattaaq nunaqarfiit aallartitaat maannakkorpiaq atukkatik anguniakkatillu pillugit saqqummiillutik. Kingullertut saqqummiipput nunatsinni nunaqarfinnik pilersuinikkut pingaarutilimmik inissisimasut KNI, RAL aamma Nukissiorfiit.

Saqqummiisarnerit pingaarnertut tikkuagaat ilaatigut ukuupput:

- Inoqarfiit minnerit amerlavallaartut inuussutissarsiornikkut ineriartortinneqarnerat amigarpoq.
- Inoqarfiit minnerit eqqaanni aalisarnikkut periarfissat suli pitsaanerusemik atorneqarsinnaagaluarput.
- Inoqarfinni minnerni inuit atuagarsornikkut ilinniarsimasut amigaataapput.
- Inoqarfinni minnerni illut, aqquuserngit talittarfiillu aserfallakkaluttuinnartut qanoq iliuuseqarfigineqartariaqalerput.
- Inoqarfinnik minnernik kiffartuussineq pilersuinerlu annernut naleqqiullugu ajorneruvoq.
- Inoqarfinnit minnernit annernut nuttarneq annertusiartuinnarpoq.
- Kommunit nutaamik aaqqissuuteqqinnerat inoqarfiit minnerit assut atupiloorpaat, politikkikkullu sunniuteqarsinnaanerat qangamut naleqqiullugu inoqarfiit ilarpassuini ajornerulerpoq.
- Inoqarfinni minnerit inoqarfinnut annernut naleqqiullugit ineriartortitsinikkut aningaasaliisarnikkullu equngasumik inissisimanerat malunnarpoq.
- Taamaakkaluartoq saqqummiisut ilaasa malunnarsisippaat nunaqarfiit ilaanni ineriartortitsineq ingerlasoq, pimoorunneqarnerusinnaasorli.